



Aqqalu C. Jerimiassen
Atassut sinnerlugu Inatsisartunut ilaasortaq

§ 37 nr. 52/2020-imut akissut

1. Naalakkersuisut Dronning Ingridip Napparsimavissuanut aserfallatsaaliinermut pisussaaffeqarpat?

Iluarsaanermi suliassat isumagineqarnerat Dronning Ingridip Napparsimavissuani ingerlatsinermut immikkoortortamit ingerlaanneqarpoq. Taamaalillutik Naalakkersuisut Dronning Ingridip Napparsimavissuani iluarsaanermi suliassat naalakkersuinikkut akisussaaffigaat.

2. Naalakkersuisut naliliinerat malillugu Dronning Ingridip Napparsimavissuata aserfallatsaalinissaa pisariaqarpa?

a. Taamaassimappat qaqugu aserfallatsaaliisoqarniarpa?

- 1) Aap, Dronning Ingridip Napparsimavissuani iluarsaanissaq pisariaqartinneqarpoq.
- a) Dronning Ingridip Napparsimavissuani iluarsaanerit maannangaaq ingerlaavartumik ingerlanneqareerput.

Atortut ataatsimut isigalugu pisoqaliartornerisa kingunerisaanik iluarsagassanik nutaanik ingerlaavartumik pisariaqartitsisoqalertarnera pissutigalugu iluarsaanerup inaarutaasumik qaqugu naammassineqarnissaa ulluleruminaallunilu ukiuleruminaappoq.

3. Naalakkersuisut qanoq naatsorsuutigivaat Dronning Ingridip Napparsimavissuani aserfallatsaaliineq qanoq naleqassasoq?

Maanna init nallaviit iluarsarneqarnissaat ajornakusuusaaq, tassa illut maanna sananeqaataat tunngavissat pisoqalisimasut malillugit 70-ikkunni pilersaaruserneqarsimanerat aammalu pingaartumik init sisamanik siniffissaqarlutik uffarfillit perusersartarfillillu pineqarnerat

16-03-2020
Sags nr.2020-4469
Akt nr. 13200764

Postboks 1160
Tlf: 34 50 00
Fax: 34 55 05
3900 Nuuk
Email: pn@nanoq.gl
www.naalakkersuisut.gl

pissutigalugu, tamatumani assersuutigalugu kørstolertut isersinnaanatik. Tamatuma saniatigut betoni piiminaatsoq atorlugit sananeqarsimavoq, tamatumalu nassatarisaanik betonimik sanaami maanna atuuttumi nalasunut immikkoortortaq allangortiterneqaralaruni tamanna ullutsinnut naleqquttuussanngilaq aammalu sutigut tamatigut aningaasaliinerussalluni pitsaanngitsoq, naak siunissaq qaninnerusoq isigalugu iluarsaanissaq nutaamik sanaartornissamit akikinnerussagaluartoq. Ullumikkut napparsimmavinni init kisermaattarissat namminneq perusersartarfillit sananeqartarput, assigiinngitsullu eqqarsaatigalugit napparsimasut isumannaannerunissaat taamaaliornikkut qulakkeerneqarluni.

Toqqarneqarsinnaasoq alla tassaavoq napparsimmavimmi illut nallaviit katsorsaasarfiillu marluk isaterneqarnissaat kiisalu illutamik nakorsaasersuinermi pilattaasarnermilu nallavissamik misissuisarfissamillu ullutsinnut naleqquttumik sananissat kiisalu napparsimasunut najugaqarfittalimmik allaffiliornissaq. Illutaq nutaaq 500 mio. kr.-it missaannik akeqartussatut missingerneqarpoq.

2020-mi aningaasanut inatsimmut atatillugu immikkoortumik nalaffimmik napparsimasunullu akunnittarfimmik nutaamik pilersaarusiernerup aallartinnissaanut aningaasanik immikkoortitsisoqarpoq.

4. Sinerissami napparsimaviit aqqissugassaanersut Naalackersuisut ilisimasaqarfigivaat?

Illutat qanoq issusiat nunap immikkoortuini napparsimaviit akornanni nikerarpoq. Napparsimmavinni arlalinni aserfallatsaaliinikkut annikinnerusumik kinguttooruteqartoqarpoq.

Sisimiuni nunap immikkoortuani napparsimmavik 1953-imi sananeqarpoq aammalu 1995-imi nutarterneqarluni. Naak napparsimmavik taama pisoqaatigigaluartoq aserfallatsaaliiornera naammaginarpoq, tassa illutap aserfallatsaaliineqarnissaanut assersuutigalugulu illup iluata silaannaqarnerata pitsanngorsarneqarnissaanut teknikikkut atortut pitsanngorsarneqarnissaanut ingerlaavartumik aningaasaliisoqartarmat.

1995-imi nutarterinermi misissuisarfik allangortinneqarlunilu ilaneqarpoq. Napparsimmaviup immikkoortutoqaata illutaata sananeqaataa allangortinneqanngilaq, tamatumalu nassatarisaanik immikkoortoqarfik nallavik sanaqqaarneqarnermisulli iluseqarluni,

tamatumalu nassatarisaanik illutaani init nallaviit aammalu uffarfiit perusersartarfiillu ullutsinnut naleqqukkunnaavissimallutik.

Aasiaanni nunap immikkoortuani napparsimmavik 1959-imi sananeqarpoq. Napparsimmavik arlaleriarluni iluarsarneqarsimavoq, Sisimiunili nunap immikkoortuani napparsimmavik assigalugu ilusilersorneqarnera ullutsinnut naleqqunnani 1959-imiilli allanngortinneqanngilaq.

Ullumikkut atortutigut piunasaqaatit naammassiumallugit aammalu peqqinnissaqarfiup sullissinermi qaffasissuseq napparsimasunut neqeroorutigerusutaa malikkumallugu nunap immikkoortuini napparsimmaviit taakku marluk nutarterneqartariaqarlutillu ullutsinnut naleqquttunngorlugit allanngortiterneqartariaqarlutik.

Qaqortumi nunap immikkoortuani napparsimmavik 1970-imi sananeqarpoq aammalu 2005-imi allanngortiterneqarluni. Allanngortiterneqarnerani/ilaneqarnerani nakorsiartarfimmik nutaamik pilerneqarpoq kiisalu suliassaqarfiit assigiinngitsut nuutsiterneqarlutik.

Napparsimmavik ingerlaavartumik aserfallatsaaliorneqarpoq kiisalu ullutsinnut naleqqussarlugu ineriartortinneqarluni, tamatumani atortussanngortitseqqiffimmik elevatorimillu nutaamik pilersitsisoqarluni. Taamaatumillu napparsimmavik pitsaasumik sananeqaateqarlunilu inissaqarluarmat annertunerusumik naleqqussaaniisaq pisariaqartutut isigineqarnani.

Ilulissani nunap immikkoortuani napparsimmavik 1979-imeersuuvoq, taamaattorli 2002-mi iluarsarneqarlunilu allilerneqarpoq ininik misissuisarfinnik arfinilinnik, ininik ataatsimeersuartarfimmik aammalu 2012-imi sulisusut nerisarfianik. Napparsimmavik ingerlalluarpoq aammalu illutamigut pitsaasumik illuni aammalu ABA-mik atortui kiisalu qullilersorneqaatai LED-mik qaammaqputinik taarserneqaqqammerlutik. Napparsimmavik inissakilliorfiuvoq aammalu ininik toqqorsivissanik amigaateqarfiulluni.

Inussiarnersumik inuulluaqqusillunga
Med venlig hilsen


Martha Abelsen